

Chor Rumantsch goes USA

DA LINARD AUGUSTIN

■ (cp) Igl Chor Rumantsch è nia fundo igl 1895. Gio da chel taimp scu anc ossa è l'intensiu digl chor da mantignier ena cuminanza tranter igls Rumantschs dallas differentas valladas e passantar en bung taimp ansemen uscheia tg'ins creescha regurdientschas tgi vignan a restar ena veta duranta. Spezial è tg'igl chor vign mano e dirigia da giuvenils e giuvenilas. Uscheia tg'ins ampren da er gio bod a surpiglier responsabladad ed ins vei scu tgi è dad organisar provas, fegns d'emda da provas, concerts etc.

Igl Chor Rumantsch 2016

Igl Chor Rumantsch ò gia taimps cun pi pac(a)s cantadour(a)s e taimps noua tgi el stava prest alla limita dalla sia existenza e taimps cun bler(a)s cantadour(a)s. Nous ischans fitg loschs tgi igl mument totgan 40 cantadour(a)s agl noss chor. I fò grond plascheir dad aver tants tgi èn motivos ed angaschas per cantar, pigl chor e per la cuminanza. Scu mintg'onn dainsa er chest onn en concert. Ma chest'onn dattigl dus concerts fitg extraordinaris, damai tgi nous luvragn cun




Il Chor Rumantsch da la scola chantunala da Cuira sgola bainprest en ils Stadis Unids da l'America.

band, tecnica moderna da tribuna u mighler detg cun tung, maletg, gleisch, etc. Chels concerts on li igls 2 ed igls 3 d'avregl a Vella. Nous ans legragn da mintga aspectatur.


Chor Rumantsch goes USA

Chest onn vainsa pero anc en oter highlight segl noss program. Nous vagn survagnia la caschung unica d'accompagner la StimmWerkBande all'America. 11 curaschous(as) cantadour(a)s peglian part a chest viadi. Nous sgulagn gievgia, igls 14-4-2016 davent da Milang e sa platgagn 10 ouras pi tard a Tennessee. Lò dainsa dis anfignen treis concerts. Tigl ampren concert cantainsa la 9avla sinfonia da Beethoven ansemen cun en chor dall'America. Damai tgi chesta ovra è fitg pretensiosa vainsa nous antschet a far provas supplementaras aposta per trenar chesta ovra. Chegl faschaisa ansemen cun la StimmWerkBande ed igl sies dirigent Christian Klucker. Igls dus oters concerts on li an scolas ve Tennessee. Damai spetga sen nous en viadi zont musical. Ma betg da lascher ord igl è naturalment tgi nous faschagn er en barat da cultura cun igls Americans.



«Alla notg» ei in dils maletgs dall'exposiziun Tschalers & Surcombras. Tschalers & Surcombras ei ina rinnada da poesias e fotografias da Carin Caduff. L'exposiziun ha aunc liug entochen ils 12-3-2016 el Hirschenneck a Basilea.

FOTO CARIN CADUFF



Tramettai las propostas da soluziun a flavia.hobi@bluewin.ch cun la schanza da gudignair in bel premi!

Seminari da minoritads: Rimnar e trenar cumpetenzas

DA FLAVIA HOBI

■ Davent dals 16 fin ils 21-2-2016 han enturn 30 giuvenils profità da la schanza da pudair visitar il «kick-off» seminari «opening doors» da la YEN (Youth of European Nationalities) a Belgrad, la chapitala da Serbia. Organisa quest eveniment ha la minoritad dals Serbsaromanians, numnads Cincar, cun lur organisaziun «Lunjina». Las finamiras dals quatter dis da lavur era da rimnar cumpetenzas per animar la giuventetgna da sa participar. Pli exact vul quai dir da sviluppar qualificaziuns sco per exempel tras comunicar, motivar u la lavur en gruppa. Vinavant munta quai era da pudair manar discussiuns publicas e sustegnair process da decisions; betg d'emblidar dad esser capabels da prender iniziativa. Trenà avain nus questas qualificaziuns tras modas sco «forum theatre», pensums che stevan en contact cun indigens u lavur cun social media sco «blogging» (scriver blogs) respectivament «vlogging» (far films). Quests lavuratori variants èn vegnì creads e manads da differentes trenaders professiunals.

Ma sper la lavur avain nus er emprendì bler davart ils Cincar, lur societad en Serbia, la istorgia e cultura. Tranter auter avain nus visità il museum da Nikola Tesla, igl inventader, fisicher ed electroinschigner da renum mundial. Spezial da menziunar è segir era la gronda ospitalitad dals Cincar durant la «vlach-night» nua ch'els han legì e chantà en lur lingua e plinavant preparà bleras spezialitads culinarias. Da questas dad autras minoritads avain nus gia pudì degustar il di avant durant la saira interculturala. Quai vul dir preschentaziuns da maglia e bavronda sco per exempel dals Slowens u Croats en l'Austria, dals Tudestgs en Russia u dals Frilandais per be numnar in pèr da las minoritads sa participadas. Persuenter avain nus Rumantschs fatg enconuscent la turta da nuschs, paun cun paira, chaschiel d'alp u rosoli. Latiers han ins era pudì tadlar differenta musica ed imprendier in u l'auter saut indigen. Durant il temp li-

ber u las tschaveras han ins profità da discurs interessants cun las autras minoritads che avriavan novs sguards e perspectives nunenconuscentas da las vitas differentas. Ina buna chaschun perquai era tranter auter segir la saira libra ch'era per la gronda part emplenida cun sortida e divertiment. En fitg buna regurdientscha resta uschia era la davosa saira per la quala ils Cincar han organisà ina tschaina speziala a Skadarlija en la citad veglia da Belgrad. Nus avain pass-

entà ina gronda ospitalitad davart dals Cincar sco er in vair interess davart tut las minoritads envers nossa atgna cultura. Igl è stà in seminari intensiv e fitg enritgint che ha ina giada dapli demonstrà che il fatg dad esser ina minoritad collia – independent da fatgs sco derivanza, bainstanza, lingua, religiun u cultura. Uschia restà be da dir «hvala» – grazia fitg e speranza fin in'otra giada insanuar ina da questas sentupadas nunembli-davlas tranter minoritads.



Participantas e participants fotografà a l'avertura uffiziala dal seminari da minoritads a Belgrad (Youth of European Nationalities).

FOTO OLIVÉR OSTOJIN



Spezialitads culinarias dals Cincar ch'els han preparà per la «vlach-night».

FOTO FLAVIA HOBI